

INUIT ATAQATIGIIT

Inatsisartuni



ulloq 09-10-2025

Inatsisartut Suleriaasianni § 37 imm. 1 naapertorlugu Naalakkersuisunut apeqquq imaattoq matumuuna saqqummiuppara.

Naalakkersuisunut apeqquq:

- 1. Naalakkersuisut peqqinnissamut qullersaqarfik isumaqatigivaat, Nunatsinni illoqarfiit isorliunerusut inukinnerumaallu, nal. 08.00 - 16.00 iluanni taamaallaat nakorsaqarlutik ammasarnissaat aamma uninngavittut matoqqanissaat aammalu nakorsamit Nuummi issiasumit nakorsiartinneqartarnissaat, annikitsumik allannguutaasutut taaneqaanarsinnaasoq?**
- 2. Inuup piartortup paarisariallip qanoq paarineqarnissaa, anniaateqartinnaveersaarnissaa naammaginartumillu inuunerup naggataani atugassaqartinneqarnissaata isumagineqarnissaa qanoq pissava? Assersuutigalugu Qeqertarsuarmi uusimaguni, taava inuunermi naggataa Aasiaat peqqissaaveqarfiani ittariaqassava? Ilaquttat toqqissisimaffigisat avatangiisillu ungagisat qimallugit?**

(Inatsisartunut ilaasortaq Paarma Lund Kreutzmann, Inuit Ataqatigiit)

Tunngavilersuut:

Qeqertasuarmi peqqinnissaqarfik pillugu, tusagassiutitigut Peqqissutsimut Inunnillu Innarluutilinnut Naalakkersuisup, oqaaseqaataani allassimavoq, peqqinnissaqarfiup qullersaqarfiata oqaloqatigineranit paasissutissiissimasut annikinnerusumik allannguisoqarsimasoq.

Allannguneq annikitsuinnaannani annertoqaaq, isumaqatiginanneqaaq pineqartuni sunniutissai annertummata.

Nunatsinni illoqarfiit mikinerumaat, 1600-t ataallugit najugaqarfigineqartut tamarmik matumani pineqarput.

Illoqarfinni 1600-t ataallugit inoqaraluartuni naliginnaasumik nakorsiarsinnaannerup killilerneqarnera toqqissisimananneqaaq.

Peqqinnissaqarfiup qullersaanit ilisimatitsissutigineqarsimavoq, pinartumik pisoqartillugu napparsimavinnut periarfissagissaarfiunerusunut napparsimasut nuuneqartarnissaat allannguinnermi anguniarneqartoq. Periuseq taana nutaajunngilaq allannguinnermullu attuumassuteqartinniartariaqarani. Pinartumik pisoqartillugu napparsimavinnut

periarfissagissaarfiunerusunut napparsimasunik nuussisarneq ukiorpassuarni pioreerpoq. Kisianni aamma pinavissumik pisoqartillugu massakkoqqinnaaq nakorsamit passunneqarnissaq pisariaqartinneqartarpoq allaat tamanna periarfissaangippat inuunermik naleqaratarsinnaavoq, tamanna ajorseriarfiusussaavoq akuersaaruminaatsoq.

Uummammik unittoorneq, taqqakkut milittoorneq kilerujussuarnerit napisoornerulluuniit annertuut, sukkasuumik suliarineqarnissamik pisariaqarfiusarput. Illoqarfiit 1600-t inorlugit inoqaraluartuni tamakku aamma nalaaneqartarput, allannguinermit periarfissalunnerilernermik kinguneqarfiusussat. Tupinnassanngilaq pineqartuni innuttaasut allannguineq toqqissinarinngippassuk, allannguinermit annikitsuinnarmik allannguinerit taaneqartoq, eqqorneqartunut allannguineruvoq annertoorujussuaq.

Nunatsinni utoqqaat aamma amerliartorput, utoqqaliartornermit nappaatit nalaaneqarsinnaasarnerisa malinnaasarnerat ilisimavarput. Illoqarfinni mikinerusuni toqqissisimanerulluni utoqqaasinnaannerup, peqqinnissaqarnikkut periarfissat allanngornerata kalluartussaavaa. Naliginnaanerulersussaassaaq peqqissaaveqarfinnut anginerusunut uninngajartortalernissat.

Peqqinnissaqarfiup inerisarneqarnerani nunatsinni inuit naligiinnerusumik periarfissaqartinnissaat ajorseriartitsinnginnissarlu siunnerfiusariaqarsoraara, isumaqarpunga tamanna matumani uniorneqartoq.

Peqqinnissaqarfik inuiaqatigiinni pingaaruteqaqaluni inissisimavoq. Allaanguinerit ima ittut, illoqarfiit ineriartorfiusinnaannerannik kalluaasussaapput. Isumaqarpunga peqqinnissaqarnermit periarfissanik allannguinerit imaanaangitsorujussuarnik allannguiffiusut, naalakkersuinikkut isummerfigineqaqqaartariaqartut.

Kissaatigaara apeqqutit ullut qulit qaangiutsinnagit akineqarnissaat.